0.0.1 channa suttam

- 1. ekam samayam sambahulā therā bhikkhū bārānasiyam viharanti. isipatane migadāye. atha kho āyasmā channo sāyanhasamayam paţisallānā vuţţhito avāpūranam¹ ādāya vihārena vihāram
- 2. upasaṃkamitvā there bhikkhū etadavoca: "ovadantu maṃ āyasmanto². therā anusāsantu maṃ āyasmanto therā. karontu me āyasmanto therā dhammiṃ kathaṃ yathāhaṃ dhammaṃ passeyyanti.
- 3. evam vutte āyasmantam channam therā bhikkhū etadavocum: "rūpam kho āvuso channa, aniccam, vedanā aniccā, saññā aniccā, samkhārā aniccā, viññānam aniccam, rūpam anattā, vedanā anattā, saññā anattā, samkhārā anattā, viññānam anattā, sabbe samkhārā aniccā, sabbe dhammā anattā"ti.
- 4. atha kho āyasmato channassa etadahosi: mayhampi kho etam evam hoti: "rūpam aniccam, vedanā aniccā, saññā aniccā, samkhārā aniccā, viññāṇam aniccam, rūpam anattā, vedanā anattā, saññā anattā, samkhārā anattā, viññāṇam anattā, sabbe samkhārā aniccā, sabbe dhammā anattāti. atha ca pana me sabbasamkhāra samathe sabbūpadhipaṭinissagge taṇhakkhaye virāge nirodhe nibbāne cittam na pakkhandati na pasīdati na

¹apāpūranam - sīmu, svā.

bjt page 228

²āyasmantā - sīmu, sī.

santiţţhati nādhimuccati³ paritassanā upādānaṃ uppajjati, paccudāvattati mānasaṃ, atha ko carahi me attāti, na kho panevaṃ⁴ dhammaṃ passato hoti "ko nu kho me tathā dhammaṃ deseyya yathāhaṃ dhammaṃ passeyya"nti.

- 5. atha kho āyasmato channassa etadahosi. "ayam kho āyasmā ānando kosambiyam viharati ghositārāme. satthu ceva samvannito sambhāvito ca viñnūnam sabrahmacārīnam pahoti ca me āyasmā ānando tathā dhammam desetam yathāham dhammam passeyyam, atthi ca me āyasmante ānande tāvatikā vissaṭṭhi, yannūnāham yenāyasmā ānando tenupasankameyya"nti.
- 6. atha kho āyasmā channo senāsanam saṃsāmetvā pattacīvaramādāya yena kosambi ghositārāmo, yenā-yasmā ānando tenupasaṃkami. upasaṃkamitvā āyasmatā ānandena saddhim sammodi. sammodanīyam katham sārānīyam visāretvā ekamantam nisīdi. ekamantam nisinno kho āyasmā channo āyasmantam ānandam etadavoca: "ekamidāham āvuso ānanda, samayam bārānasiyam viharāmi isipatane migadāye, atha kho aham āvuso sāyanhasamayam paṭisallānā vuṭṭhito avāpūraṇam ādāya vihārena vihāram upasaṃkamim. upasaṃkamitvā there bhikkhū etadavocum: "ovadantu mam āyasmanto therā anusāsantu mam āyasmanto

pts page 133

³na vimuccati - sīmu.

⁴nakhopanetam - sīmu.

therā, karontu me āyasmanto therā dhammim katham yathāham dhammam passeyya"nti.

- 7. evam vutte mam āvuso, therā bhikkhū etadavocum: rūpam kho āvuso channa, aniccam, vedanā aniccā, saññā aniccā, samkhārā aniccā, viññāṇam aniccam, rūpam anattā, vedanā anattā, saññā anattā, samkhārā anattā, viññāṇam anattā, sabbe samkhārā aniccā, sabbe dhammā anattāti.
- 8. tassa mayham āvuso, etadahosi: "mayhampi kho etam evam hoti: rūpam aniccam, vedanā aniccā, saññā aniccā, samkhārā aniccā, viññāṇam aniccam, rūpam anattā, vedanā anattā, saññā anattā, samkhārā anattā, viññāṇam anattā, sabbe samkhārā aniccā, sabbe dhammā anattāti.
- 9. atha ca pana me sabbasamkhārasamathe sabbūpadhipaţinissagge tanhakkhaye virāge nirodhe nibbāne
 cittam na pakkhandati na pasīdati na santiţţhati nādhimuccati. paritassanā upādānam uppajjati. paccudāvattati mānasam. atha ko carahi me attāti. na kho
 panetam dhammam passato hoti, ko nu kho me tathā
 dhammam deyeyya yathāham dhammam passeyya'nti.
- **10.** tassa mayham āvuso, etadahosi: "ayam kho āyasmā ānando kosambiyam viharati ghositārāme satthu

ceva saṃvaṇṇito sambhāvito ca viññūnaṃ sabrahmacārinaṃ. pahoti ca me āyasmā ānando tathā dhammaṃ desetuṃ, yathāhaṃ dhammaṃ passeyyaṃ. atthi ca me āyasmante ānande tāvatikā vissaṭṭhi, yannūnāhaṃ yenāyasmā ānando tenupasaṃkameyya'nti. ovadatu maṃ āyasmā ānando, anusāsatu maṃ āyasmā ānando, karotu me āyasmā ānando dhammiṃ kathaṃ, yathāhaṃ dhammaṃ passeyyanti.

- 11. ettakenapi mayam āyasmato channassa attamanā abhiraddhā, tam⁵ āyasmā channo āvīakāsi. khilam pabhindi⁶, odahāvuso channa sotam. bhabbo'si dhammam viñnātu'nti. atha kho āyasmato channassa tāvatakeneva⁷ uļāram pītipāmojjam uppajji bhabbo kirasmi dhammam viñnātu"nti.
- 12. sammukhā me taṃ āvuso channa, bhagavato sutaṃ sammukhā ca paṭiggahitaṃ kaccānagottaṃ bhikkhuṃ ovadantassa "dvayanissito khoyaṃ kaccāna, loko yebhuyyena atthitañce va natthitañca, lokasamudayaṃ kho kaccāna yathābhūtaṃ sammappaññāya passato yā loke natthitā sā na hoti. lokanirodhaṃ kho kaccāna yathābhūtaṃ sammappaññāya passato yā loke atthitā sā na hoti. upayūpādānābhinivesavinibandho kho'yaṃ kaccāna, loko yebhuyyena, tañcāyaṃ upayūpādānaṃ cetaso adhiṭṭhānābhinivesānusayaṃ na upeti.

⁵attamanā apināma tam - machasam.

_

⁶khīlaṃ chandi - machasaṃ.

⁷tāvadeva - sīmu.

na upādiyati na adhiţţhāti 'attā me'ti dukkhameva uppajjamānam uppajjati. dukkham nirujjhamānam nirujjhatī"ti. na kaṅkhati na vicikicchati. aparapaccayā ñāṇamevassa ettha hoti. ettavatā kho kaccāna sammādiţţhi hoti.

- 13. "sabbamatthi"ti kho kaccāna, ayameko anto, "sabbam natthi"ti kho ayam dutiyo anto, ete te kaccāna, ubho ante anupagamma majjhena tathāgato dhammam deseti: "avijjāpaccayā saṃkhārā, saṃkhārāpaccayā viññāṇam, viññāṇapaccayā nāmarūpam nāmarūpa paccayā saļāyatanam. saļāyatanapaccayā phasso, phassapaccayā vedanā, vedanāpaccayā taṇhā, taṇhāpaccayā upādānam, upadānapaccayā bhavo, bhavapaccayā jāti, jātipaccayā jarāmaraṇam sokaparidevadukkhadomanassupāyāsā sambhavanti, evametassa kevalassa dukkhakkhandhassa samudayo hoti.
- 14. avijjāyatveva asesavirāganirodhā saṃkhāranirodho saṃkhāranirodhā viññāṇanirodho, viññāṇanirodhā nāmarūpanirodho, nāmarūpanirodhā saļāyatananirodho, saļāyatanirodhā phassanirodho phassanirodhā vedanānirodho, vedanānirodhā taṇhānirodho taṇhānirodhā upādānanirodho upādānanirodhā bhavanirodho, bhavanirodhā jātinirodho, jātinirodhā jarāmaraṇaṃ sokaparidevadukkhadomanassupāyāsā nirujjhanti. evametassa kevalassa dukkhakkhandhassa nirodho hotī"ti.

pts page 135

bjt page 232

15. evametam⁸ āvuso ānanda hohi, yesam āyasmantānam tādisā sabrahmacārayo anukampakā atthakāmā ovādakā anusāsakā. idanca pana me āyasmato ānandassa dhammadesanam sutvā dhammo abhisametoti.

⁸ecañca te - sīmu.